



鲁迅全集

第八卷

日记

(一九一二年 - 一九二六年)

中国文联出版社

目 录

目 记

壬子日记.....	3
癸丑日记	37
甲寅日记	87
乙卯日记.....	137
丙辰日记.....	191
丁巳日记.....	249
戊午日记.....	289
己未日记.....	329
日记第九.....	361
日记第十.....	387
日记十二.....	419
日记十三.....	455
日记十四.....	497
日记十五.....	543

日记

壬子日记

五 月

五日 上午十一时舟抵天津。下午三时半车发，途中弥望黄土，间有草木，无可观览。约七时抵北京，宿长发店。夜至山会邑馆访许铭伯先生，得《越中先贤祠目》一册。

六日 上午移入山会邑馆。坐骡车赴教育部，即归。予二弟信。夜卧未半小时即见蜚虫^[1]三四十，乃卧卓上以避之。

七日 夜饮于广和居。^[2]长班为易床板，始得睡。

八日 致二弟信，凡三纸，恐或遗失，遂以快信去。下午得二弟信，二日发。夜饮于致美斋，国亲作主。

九日 夜小雨。微觉发热，似冒寒也。

十日 晨九时至下午四时半至教育部视事，枯坐终日，极无聊赖。国亲移去。

十一日 上午得二弟、信子、三弟信，五日发。午就胡梓方寓午餐。夕董恂士来，张协和亦至，食于广和居。董君宿于邑馆，以卓卧之。

十二日 星期休息。晨协和来。午前何燮侯来，午后去。下午与季葑、诗荃、协和至琉璃厂，历观古书肆，购傅氏《纂〔纂〕喜庐丛书》一部七本，五元八角。寄二弟信。

十三日 午阅报载绍兴于十日兵乱，十一犹未平。不测诚

妄，愁绝，欲发电询之，终不果行。夕与季葦访燮和于海昌会馆。

十四日 晨以快信寄二弟，询越事诚妄。

十五日 上午得范爱农信，九日自杭州发。

十六日 下午蒯若木来。夕蔡国青来，饭后去。

十七日 大雨。宣武门左近积水没胫，行人极少，予与季市往返共一骡车。

十八日 晴。下午吴一斋来。董恂士、张协和来，与季市俱至广和居，蔡国亲已先在，遂共饭。夜恂士宿季市处。

十九日 与恂士、季市游万生园。又与季市同游陶然亭，其地有造象，刻梵文，寺僧云辽时物，不知诚否。苦望二弟信不得。夜得范爱农信，十三自杭州发。

二十日 晨得宋子佩信，十二自越发。上午得童鹏超信，十三自越发，谬极。

二十一日 上午顾石臣至部来访，谢不见。晚散步宣武门外，以铜元十枚得二花卉册，一梅，一夫渠，题云恽冰绘，恐假托也。

二十二日 晚顾石臣来，纠缠不已，良久始去。

二十三日 晨寄范爱农、宋子佩信。下午得二弟信，十四日发，云望日往申迎羽太兄弟。又得三弟信，云二弟妇于十六日下午七时二十分娩一男子，大小均极安好，可喜。其信十七日发。晚寄二弟信。

二十四日 梅君光羲贻佛教会第一、二次报告各一册。

二十五日 下午至琉璃厂购《李太白集》一部四册，二

元；《观无量寿佛经》一册，三角一分二；《中国名画》第十五集一册，一元五角。

二十六日 星期休息。下午同季市、诗荃至观音寺街青云阁啜茗，又游琉璃厂书肆及西河沿劝工场。

二十七日 得二弟信，二十一日发。

二十八日 晨寄二弟及其夫人信。晚谷青来。

二十九日 无事。

卅日 得津帖六十元。晚游琉璃厂，购《史略》一部两册，八角；《李龙眠白描九歌图》一帖十二枚，六角四分；《罗两峰鬼趣图》一部两册，两元五角六分。

卅一日 下午寄二弟信。晚得二弟、三弟信，廿六日发。夕谷清招饮于广和居，季市亦在坐。

六 月

一日 下午寄二弟、三弟信。晚同恂士、铭伯、季市饮于广和居。

二日 星期休息。午后铭伯、季市、诗荃同游万生园。张协和、游观庆来，不值。

三日 夜腹痛。收二十七、八日《民兴日报》各一分。

四日 得范爱农信，三十日杭州发。

五日 下午寄二弟信。晚雨有雷，少顷霁。

六日 下午雨。得二弟信，三十日发。夜补绘《於越三不朽图》阙叶三枚。

七日 阴。得升叔信，二日九江发。收初一日《民兴日

报》一分。得杜海生信。

八日 晚访杨莘士于吴兴会馆。国亲来。收五月卅一日《民兴报》一分。

九日 晨商生契衡来。上午至青云阁理发。午后赴琉璃厂购《四印斋校刻词三种》一部四册，一元；善化童氏刻本《沈下贤集》一部二册，二元五角；《畿辅丛书》本《李卫公会昌一品集》一部六本，二元。得二弟信，三日杭州发。收初二、三《民兴报》各一分。夜大雷雨。

十日 晨寄二弟信。寄杜海生信。上午得三弟信，初四日发。收四日《民兴日报》一分。午后与齐君宗颐赴天津，寓其族人家，夕赴广和楼考察新剧，则以天阴停演，遂至丹桂园观旧剧。

十一日 上午至日租界加藤洋行购领结一，六角五分；革履一；五元四角。午后赴天乐园观旧剧。夜仍至广和楼观新剧，仅一出，曰《江北水灾记》，勇可嘉而识与技均不足。余皆旧剧，以童子为之，观者仅一百卅余人。

十二日 晚自天津返北京。微雨。得二弟及信子信，并六日发。收五日《民兴报》一分。

十三日 晚小雨。饮于广和居，国亲为主，同席者铭伯、季市及俞英崖。收六、七日《民兴日报》各一分，有《童话研究》，起孟作也。

十四日 晨寄三弟及二弟妇信。午后与梅君光羲、吴[胡]君玉搢赴天坛及先农坛，审其地可作公园不。收八日《民兴报》一分。

十五日 午寄二弟信。下午得二弟及三弟信，并九日发。收九日《民兴日报》一分。

十六日 星期休息。上午赴青云阁购袜子、日伞、牙粉等共二元六角。又赴琉璃厂购《龚半千画册》一本，八角；陈仁子《文选补遗》、阮刻《列女传》各一部，共六元。下午寄二弟及三弟信。晚协和、谷青来谈。

十七日 收十日、十一日《民兴报》各一分。大热。

十八日 晨头痛，与齐寿山闲话良久始愈。晚雷雨。

十九日 旧端午节。收十二日《民兴报》一分。夜铭伯、季市招我饮酒。

二十日 收十三日《民兴日报》一分。

二十一日 下午四时至五时赴夏期讲演会演说《美术略论》，听者约三十人，中途退去者五六人。收十四日《民兴日报》一分。收共和党事务所信。

二十二日 得二弟信，十五日绍兴发。又得升叔信，十六日九江发。收十五、十六日《民兴日报》各一分。蔡总长元培于昨日辞职。收共和党证及徽识。

二十三日 星期休息。上午寄三弟信，内附与二弟信一小函。下午董恂士来谈，晚饮于广和居，铭伯亦去，季市为主。收十七、十八日《民兴日报》各一分。

二十四日 无事。

二十五日 雨，傍午霁。午后视察国子监及学宫，见古铜器十事及石鼓，文多剥落，其一曾剌以为臼。中国人之于古物，大率尔尔。

二十六日 上午太学守者持来石鼓文拓本十枚，元潘迪《音训》二枚，是新拓者，我以银一元两角五分易之。下午得二弟信，二十一日杭州发，内附《童话研究》草稿四枚。收十九、二十日《民兴日报》各一分。收全浙公会信，内《全浙公会章程草案》四纸，发起者孙宝瑚、汪立元、王潜、李升培、王葵、王亮等，皆不相识，未知其人如何，拟置不报。

二十七日 下午假《庚子日记》二册读之，文不雅驯，又多讹夺，皆记拳匪事，其举止思想直无以异于斐、澳野人。齐君宗颐及其友某君云皆身历，几及于难，因为陈述，为之瞿然。某君不知其名氏，似是专门司司员也。收二十一日《民兴日报》一分。

二十八日 午后小雨，旋止。四时赴夏期讲演会述《美术略论》，至五时已。收三弟信，二十二日发。收二十二日《民兴报》一分。晚复雨，旋止。

二十九日 晨寄二弟信。又寄三弟信。收本月津帖六十元。下午至直隶官书局购《雅雨堂丛书》一部二十册，十五元；《京畿金石考》一部二册，八角。得二弟妇信，附芳子信一纸，二十三日发。收二十三日《民兴报》一分。夜饮少许酒。

三十日 星期休息。上午谢西园来，云居香炉营头条谢宅，商生契衡亦至，饭于广和居，午后并去。收二十四日《民兴报》一分。

七 月

一日 部改上午七时半至十一时半为理事时间。得二弟信，六月二十六日杭州发。收六月二十五日《民兴日报》一分。

二日 蔡总长第二次辞职。收协和还金五元。收二十六日《民兴报》一分。

三日 下午与季市浴于观音寺街之升平园，甚适。至琉璃厂购明袁氏本《世说新语》一部四册，二元八角，尚不十分利弊，惜纸劣耳。又《草堂诗余》一册，二角，似是《词学丛书》残本也。

四日 上午寄二弟信。午得陈子英信，二十七日绍兴发。又得三弟信并《近世地理》一册，二十八日绍兴发。收廿七、廿八日《民兴报》各一分。

五日 大雨。下午四时赴讲演会，讲员均乞假，听者亦无一人，遂返。寄三弟信，内附与二弟妇及芳子信一小函。得二弟信，三十日发。夜又大雷雨。

六日 雨。晨寄二弟信。午得三弟信，二十九日发。收二十九日《民兴日报》一分。晚与季市同饮于广和居。

七日 星期休息。晨得刘楫先信，初一日上虞发。午得二弟信，初一日发。收六月卅、七月一日《民兴日报》各一分。午后协和、谷青来。夜雨。

八日 雨。上午得上海通俗教育会信并《通俗教育研究录》一册。

九日 晴。下午收二日、三日《民兴日报》各一分。临时教育会议开始。夜小雨。

十日 晴，热。上午九时至十时诣夏期讲习会述《美术略论》，听者约二十余人。午前赴东交民巷日本邮局寄东京羽太家信并日银十圆。下午与季市访蔡子民于其寓，不值。夜小雨。

十一日 寄三弟信，内附与二弟信一小函，又与二弟妇笺一枚。收小包一，内 P. Gauguin: 《Noa Noa》、W. Wundt: 《Einführung in die Psychologie》各一册，六月二十七日绍兴发。夜读皋庚所著书，以为甚美；此外典籍之涉及印象宗者，亦渴欲见之。夜收初四日《民兴日报》一分。夜大雨。

十二日 晴。下午得二弟信，五日发。又得三弟信，六日发。晚收五日、六日《民兴日报》各一分。夜雨。闻临时教育会议竟删美育，此种豚犬，可怜可怜！

十三日 雨。无事。

十四日 晴。星期休息。晨寄二弟及三弟信。上午张协和、杨莘士来。收初七日《民兴日报》一分。下午偕铭伯、季市饮于广和居，甚醉。夜又收初八日《民兴日报》一分。

十五日 上午至教育会傍听少顷。下午部员为蔡总长开会送别，不赴。收初九日《民兴日报》一分。

十六日 晨收本月分津帖六十元。收初十日《民兴日报》一分。夜雨。

十七日 雨。教育部次长范源濂代理总长。上午九时至十时在夏期讲习会述《美术略论》，初止一人，终乃得十人，是日

讲毕。傍午晴。下午谢西园来谈，假去十圆。晚饮于季市之室。

十八日 上午收十一日《民兴日报》一分。下午大热，动雷。

十九日 晨得二弟信，十二日绍兴发，云范爱农以十日水死。悲夫悲夫，君子无终，越之不幸也，于是何几仲辈为群大蠹。午收十二、十三日《民兴日报》各一分。下午与季市访蔡子民不遇，遂至董恂士家，与钱稻孙谈至晚才返。

二十日 上午寄二弟信。又寄陈子英信。收十四日《民兴报》一分。下午赴青云阁购日用什物，又至琉璃厂购《黄子久秋山无尽图卷》一册，五角；《梦窗词》一册，四角；《老学庵笔记》二册，八角。晚杨莘士、钱稻孙来，遂同饮于广和居，季市亦往。夜大雨。

二十一日 阴。星期休息。上午雨。胡孟乐来。杜海生来。下午大雨。蔡谷青来。晚得二弟及三弟信，十五日发。又收十五日《民兴报》一分。

二十二日 大雨，遂不赴部。晚饮于陈公猛家，为蔡子民饯别也，此外为蔡谷青、俞英垕、王叔眉、季市及余，肴膳皆素。夜作均言三章，哀范君也，录存于此：

风雨飘摇日，余怀范爱农。华颠萎寥落，白眼看鸡虫。

世味秋荼苦，人间直道穷。奈何三月别，竟尔失畸躬！

海草国门碧，多年老异乡。狐狸方去穴，桃偶已

登场。

故里寒云恶，炎天凛夜长。独沈清冷水，能否涤愁肠？

把酒论当世，先生小酒人。大圜犹茗芋，微醉自沈沦。

此别成终古，从兹绝绪言。故人云散尽，我亦等轻尘！

二十三日 雨。天气颇寒。上午收十七日《民兴日报》一分。下午杜海生来。俞英匡以吴镇及王铎画山水见视。

二十四日 阴。上午得羽太家信，十七日东京发。收夏期讲演会车马费十元。收十六、十八日《民兴日报》各一分。午后微雨。

二十五日 阴。下午寄二弟信，内附与三弟笺一枚。钱稻孙来。

二十六日 晴。闻教育部总长为范源廉。下午谢西园来。得二弟信，二十日发。收二十日《民兴日报》一分。俞英匡、王叔眉两君来。

二十七日 上午寄二弟信。午得二弟及三弟信，二十一日发。收二十一日《民兴报》一分。晚与季市赴谷青寓，燮和亦在，少顷大雨，饭后归，道上积潦二寸许，而月已在天。

二十八日 星期休息。晨稻孙来，午饭于广和居，季蕸、莘士在坐。饭后赴吴兴馆，夜又饭于便宜坊。收十九日《民兴日报》一分。雨。

二十九日 阴。无事。夜雨。闻董恂士为教育部次长。

三十日 晴。午后收二十二及二十三日《民兴日报》各一分。下午赴中国通俗教育研究会，傍晚乃散。此会即在教育部假地设之，虽称中国，实乃吴人所为，那有好事！晚恂士来，饭于季市之室。

三十一日 晴，午后雨。本部开谈话会，总、次长演说。下午收二十四、二十五日《民兴日报》各一分。傍晚晴。

八 月

一日 午后稻孙来，在季葦之室，遂同往琉离厂，购《埤雅》一部四本，二元，似明刻也。晚饮于广和居，颇醉。

二日 午前得二弟信，二十七日发，有哀范爱农诗，云：天下无独行，举世成委靡。皓皓范夫子，生此叔季时。傲骨遭俗嫉，屡被蝼螳欺。侘傺尽一世，毕生清水湄。今闻此人死，令我心伤悲。扰扰使君辈，长生亦尔为！收廿七日《民兴日报》一分。午后寄二弟信。录汪文台辑本《谢沈后汉书》一卷毕。又收廿六日《民兴报》一分。晚杨莘士招饮于广和居，同席者章演群、钱稻孙、许季黻。夜风，微雨。

三日 雨，上午晴。无事。

四日 晴。星期休息。上午收廿八日《民兴日报》一分。午后钱稻孙、杜海生来。晚蒯若木来。

五日 上午冯汉叔至部见访。午收二十九日《民兴日报》一分。下午赴部听教育会议员说各地教育状况，而到者止浙江二人。晚雨，有风。

六日 雨。伍博纯来劝入通俗教育研究会甚力，却之不

得，遂允之。收卅日《民兴日报》一分。

七日 晴。上午冯汉叔至部见访。午归寓途中车仆堕地，左手右膝微伤。见北京报载初五日电云，绍兴分府卫兵毁越铎报馆。收七月卅一日、八月一日《民兴日报》各一分。晚得二弟所寄小包，内复氏《美术与国民教育》一册，福氏《美术论》一册，均德文，一日付邮。

八日 上午得二弟信，二日发。下午寄二弟信。钱稻孙来。

九日 晨得谢西园信并还银十圆。午后张燮和来，同季市饮酒少许。夜雨。

十日 阴，午后雨。晚小饮于季市之室。

十一日 雨。星期休息。午后杜海生来。下午杨莘士、钱稻孙来。晚收二弟所寄德文思氏《近世造形美术》一册，初五日付邮。

十二日 晴。数日前患咳，疑是气管病，上午就池田医院诊之，云无妨，惟神经衰弱所当理耳。与水药、粉药各二日分，价一元二角，又初诊费二元。下午得二弟及三弟信，初六日发。半夜后邻客以闽音高谈，狺狺如犬相啮，不得安睡。

十三日 阴。上午寄二弟及三弟信。

十四日 晴。上午至池田医院就诊。午后同季市至廊房头条劝工场饮茗，余又理发。复至土地祠神州国光社购《南雷余集》一册，《天游阁集》一册，共一元二角。夜饮于季市之室，食蒲陶、鳊鱼、杏仁。得二弟所寄小包二，内《域外小说集》第一、第二各五册，初八日付邮，余初二函索，将以